

և էր տեղեակ քան զայլ Երուսաղէմացիս յիշատակութեան անցիցն անցելոյ ընդ Յիսուս Քրիստոս և ընդ աշակերտս նորա :

Ապա եցոյց Յուդա զտեղին յոր արկեալ էին Հրէայք զԽաչափայտն եւ ծածկեալ ընդ աղբիւսօք . յետ բազում յուզմանց եւ բառնալոյ զհողն գտին զերիս խաչան հինգ բեւեռօք , յորոց բժշկութեամբ պատանւոյ միոյ մեռելոյ ընտրեցաւ խաչն Քրիստոսի : Եւ ինքն Յուդա հաւատացեալ 'ի խաչելեալն Քրիստոս՝ մկրտեցաւ հանդերձ մարն , եւ ըստ ակնարկութեան Հեղինեայ կոչեցաւ Կիւրեղ եւ ձեռնադրեցաւ յԵպիսկոպոսութիւն միոյ քաղաքացն Պաղեստինոյ , և որպէս կարծի , նստաւ առ ժամանակ մի եւ յԱթոռն Երուսաղէմի զինի Մակարայ կամ 'ի ժամանակս աքսորանաց մեծին Կիւրղի :

Կանգնեցան հոյակապ տաճարք 'ի Ս . Տեղիս յԵրուսաղէմ և արտաքոյ նորին հրամանաւ Մեծին Կոստանդիանոսի և մօր նորա Հեղինեայ 'ի Տրդատայ արքայէն Հայոց : Կանգնեցաւ Տաճար փառաւոր 'ի տեղի Գիւտի Խաչքն իբրեւ շինուած նորին Հեղինեայ : Իսկ Մովսէս Կաղանկայտուացի պատմիչ եօթներորդ դարու , նկարագրէ ըզ-Սուրբ Տեղիս և զեկեղեցիս Երուսաղէմի . եւ վասն այսր տաճարի ասէ . Եկեղեցին Կաթողիկէ , որ մատուռն անուանի որ է Գիւտ Խաչին . 63 սիւն վեր և 'ի ներքոյ երկայնութեան . Պար . Աղւան . Հար . Ա . 421 : Աւերակք եկեղեցւոյս այժմ նշմարին յարտաքուստ՝ զոր աւերեցին Սուլթանք Եգիպտոսի 'ի ժամանակի իշխանութեան իւրեանց , եւ յետոյ 'ի տեղի նորա կառուցեալ է եկեղեցի փոքր 'ի վերայ չորից սեանց յանուն Ս . Լուսաւորչի և է 'ի ձեռս Հայոց : Ապա սկիզբն եղեւ շինելոյ մեծ և փառաւոր եկեղեցի յանուն Ս . Յարութեան 'ի վերայ Գերեզմանին Քրիստոսի : Լատին պատմիչք ասեն թէ Կոստանդիանոս յետ կատարելոյ զքսանամեակն իւր գրեաց առ Մակար եպիսկոպոսն Երուսաղէմի շինել այնպիսի հոյակապ եկեղեցի 'ի վերայ Գերեզմանին Քրիստոսի , մինչ զի գեղեցիկութեամբ եւ պայծառութեամբ եւս քան զեւս գերազանց փայլիլ քան զամենայն Տաճարս որ յամենայն տեղիս . թէպէտ մայր նորա Հեղինէ ոչ ետես զկատարումն նորին , զի յետ